

Ilanngussaq H

Ilanngussaq 2, AIS2018-ip pingajussaaneernejarnissaanut atatillugu oqaasertaliussanut allannguutissatut siunnersuutit aamma oqaasertaliussanut nassuiaatit:

Ilanngussaq

Bilag

2

Naalackersuisut Siulittaasuat – Suliassaqarfik 10 - 12

Nr. 172.

Kontomut pingaarnermut 10.13.11-mut, Aktiaateqarluni ingerlatseqatigiiffinnut toqqaannartumik aningaasartuutit

Oqaaseqaat tullituttoq ilanngunniarneqarpoq:

“Nr. 1

Nalinginnaasumik immikkullu ittumik isertitat Kalaallit Airports A/S-imut aningaasaliissutitut atugassiissutigineqarnissaat

Iluanaarutit, pissarsiat, aktianik tunisinerit, ataasiartumik aningaasartuuteqarnerit, kontomi pingaarnermi 80.00.10 Sanaartugassanut Iluarsagassanullu Aningaasaateqarfimmi utertitat sanaartornermi sulianut atuinikippallaarsimanernit utertitsinerit imaluunniit ataasiartumik isertitat assingusut aqqutigalugit isertitanik immikkut ittunik Nunatta Karsiata qanoq annertutigisunik tigusaqarnera apeqqutaalluni Kalaallit Airports A/S-imi akiliutissatut katillugit 2,1 mia. kr.-it tikillugit nalilinnik atuisinnaanissamik Naalackersuisut piginnaatinneqarput. Aningaasaatinik qaffaaneq pappiaqqat nalillit akianut 100-mut imaluunniit Naalackersuisut qaffasinnerusumik aalajangigaanut akiliisoqarsinnaavoq.

Naalackersuisut immikkoortuni matuma kingulianiittuni tunngavissat nassuiaatigineqartut iluini Kalaallit Airports A/S-imut aningaasaliissuteqarnissamut piginnaatinneqarput:

1. Namminersorlutik Oqartussat ukiuni 2017, 2018 aamma 2019-imi Tele Greenland A/S-imit immikkut ittumik iluanaarutininik pissarsitillugit, iluanaarutit taakku tunngavigalugit katillugit 250 mio. kr.-inik tikillugit Kalaallit Airports A/S-imut aningaasaliissuteqarnissamut Naalackersuisut piginnaatinneqarput.

2. Namminersorlutik Oqartussat 2017-imi Royal Greenland A/S-imit immikkut ittumik iluanaarutininik pissarsitillugit, iluanaarutit taakku tunngavigalugit katillugit 70 mio. kr.-it tikillugit Kalaallit Airports A/S-imut aningaasaliissuteqarnissamut Naalackersuisut piginnaatinneqarput.

3. Namminersorlutik Oqartussat 2017-imi aktiaateqarluni ingerlatseqatigiiffinnit Namminersorlutik Oqartussanit tamakkiisumik ilaannakortumilluunniit pigineqartunit immikkut ittumik iluanaarutininik pissarsitillugit, iluanaarutit taakku tunngavigalugit katillugit 100 mio. kr. tikillugit Kalaallit Airports A/S-imut aningaasaliissuteqarnissamut Naalackersuisut piginnaatinneqarput. Aappaattut aktiaatinik 100 mio. kr.-it tikillugit nalilinnik tunisinissamut tunisinermillu tamanna iluanaarutininik Kalaallit Airports A/S-imut aningaasaliinissamut Naalackersuisut piginnaatinneqarput.

Ilanngussaq 2, oqaasertaliussat kiisalu oqaasertaliussanut nassuiaatit

4. Nunatta Karsiata 2016, 2017, 2018 aamma 2019-imi naatsorsuutai Nunatta Karsianut sinneqartooruteqartillugit sinneqartoorutit taakku Kalaallit Airports A/S-imut aningaasaliissutiginiissaannut Naalakkersuisut piginnaatinneqarput.

5. PFA Soraarnermi soraarnerussutisiassanut sillimmasiissutinut aktiaateqarluni ingerlatseqatigiiffimmi soraarnerussutisiassanut sillimmatinut maanna aaqqissuussinerit atorunnaarsinneqarnerannut atatillugu ataasiartumik annertuumik isertitaqartoqarnissaa naatsorsuutigineqarsinnaavoq. Namminersorlutik Oqartussat taama isertitanik pissarsiaqartillugit aningaasat taakku Kalaallit Airports A/S-imut aningaasaliissutiginiissaannut Naalakkersuisut piginnaatinneqarput.

6. 2018, 2019, 2020, 2021 aamma 2022-mi sanaartugassanut atuinikinnerussutinit utertitsisoqartillugu taakkunanit ukiumoortumik 50 mio. kr.-it tikillugit Kalaallit Airports A/S-imut aningaasaliissuteqarnissamut Naalakkersuisut piginnaatinneqarput.

7. Nuummi, Ilulissani Qaqortumilu mittarfinnik, mittarfeqarfiit illutaannik taakkunungalu aqqusinernik sanaartornermut atatillugu sulisut avataaneersut akileraarutaannit tamakkiisunit iluanaarutaasinnaasut Kalaallit Airports A/S-imut aningaasaliissutigineqarnissaannut Naalakkersuisut piginnaatinneqarput.

8. Naalakkersuisut piginnaatinneqarput Kalaallit Airports A/S-imi aktianik aningaasaliinissamut Namminersorlutik Oqartussat Nuummi, Ilulissani mittarfiliutaasa taakkulu illutaasa, teknikikkut atortorissaarutaasa pigisaasalu nuunneqarsinnaasut nalingi allaavigalugit akiliinissamut piginnaatinneqarput. Naalakkersuisut Kalaallit Airports A/S Ilulissani Nuummilu mittarfinnik akiliutinik Namminersorlutik Oqartussat v/Mittarfeqarfiit Nuummi Ilulissanilu nunat tamalaat akornanni mittarfiit atulernissaasa tungaanut attartortitsinissamik pisussaaffilersinnaavaat. Piffissap attartortitsiviup nalaani Mittarfeqarfiit mittarfinni pineqartuni isertitanik aningaasartuutinillu isumaginnissapput.

Nr. 2.

Naqissusiinermut akitsuuteqartitsinnginneq

Uppernarsaatit, taarsigassarsinermut uppernarsaatit, takussutissat allatullu uppernarsaatit Kalaallit Airports A/S-ip aningaasalersorneranut, ingerlanneranut sanaartorneranullu atatillugu suliarineqartut pisortanut naqissusiinermi akitsuutinik eqqorneqassanngillat, tamatumani ilaatinneqarlutik Nuummi, Ilulissani Qaqortumilu mittarfiini atasuni taakkunungalu ilaareersunik illunik, teknikikkut sanaartukkanik kiisalu pigisanik nuunneqarsinnaasunik akileeqataassutitut tunniussinerit.

Naqissusiinikkut akitsuuteqartitsinnginnermi ilaatinneqarput Nuummi Ilulissanilu mittarfinnik taakkunungalu ilaareersunik illunik, teknikikkut sanaartukkanik kiisalu pigisanik

Ilanngussaq 2, oqaasertaliussat kiisalu oqaasertaliussanut nassuiaatit

nuunneqarsinnaasunik akileeqaataassutitut Kalaallit Airports A/S-imut tunniussinerit imaluunniit pigisanik nalilinnik taamaattunik Kalaallit Airports A/S-imut tunisinerit.

Nr. 3.

Nuna tamakkerlugu pilersaarusiorneq

Nuna tamakkerlugu pilersaarusiornissamut peqqussutikkut, mittarfinnik nutaanik sanaartornissamut taakkunungalugu ilaasunut atortulersuutinut, illunut, teknikikkullu sanaartukkanut aalajangersakkat peqqissaarnerusut Naalakkersuisut aalajangiussinnaavaat aamma Naalakkersuisut aalajangersinnaavaat, nuna tamakkerlugu pilersaarusiornissamut peqqussut, Ilulissani, Nuummi imaluunniit Qaqortumi mittarfiliorluni sanaartornissani, taakkunungalugu ilaasunut atortulersuutinut, illunut, teknikikkullu sanaartukkanut nunaminertamut atuinermut aalajangersakkat peqqissaarnerusut, kommunimi pilersaarutitut inatsisitigut kinguneqassasut.

Nr. 4.

Avataanit aningaasalersorneqarneq

Inatsisartut Aningaasaqarnermut Akileraartarnermullu Ataatsimiititaliaata akuersineratigut Naalakkersuisut Kalaallit Airports A/S-ip avataani taarsigassarsisitsisuiunut 2,0 mia. kr-it angullugit qularnaveeqqusiinissamut, taakkuluunniit taartaattut nunatta karsianit 2,0 mia. kr-inik taarsigassarsisinnaanermut, taakkunungalugu Kalaallit Airports A/S-imut taarsigasseqqinnissaannik piginnaatinneqarput.

Nr. 5.

Nunani tamalaani atugassarititaasut malillugit suliariumannittussarsiorneq

Ilulissani, Nuummi Qaqortumilu mittarfiit nutaat tamarmiusut taakkuluunniit ilaasa sanaartornissaat pillugu neqeroorutininik Kalaallit Airports A/S-ip pissarsiniarnerani suliaakkiuteqarneraniluunniit sanaartornissamik isumaqatigiissutinut neqeroorutininik aammalu sanaartornissamik isumaqatigiissutit pillugit suliaakkiuteqarnissat nunani tamalaani periusissat pitsaasut naapertorlugit nunani tamalaani neqeroorutigineqarnissaasa aammalu nunani tamalaani neqeroorutigeriikkat malillugit neqeroorutigineqarnissaasa akuerinissaannut Naalakkersuisut piginnaatinneqarput.

Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq Naalakkersuisut immikkoortoq 1-imik akuersereerneranni sanaartornermutisumaqatigiissutinut atortinneqassanngilaq.

Sanasut, ruujorilerisut, innaallagisserisut sanaartortitsisunilu suliffeqartut akunnermusiallit pillugit Sulisitsisut aammalu Sulinermik Inuussutissarsiteqartut Kattuffiata akornanni isumaqatigiissummi 1. april 2016-imit 31. marts 2019-imut atuuttumi atugassarititaasut minnerpaamik assingi malillugit sulinerup ingerlanneqarnissaa Kalaallit Airports A/S-imut neqerooruteqartut aammalu Ilulissani, Nuummi Qaqortumilu mittarfiliornermik sanaartornermik ingerlataqartut qulakkiissavaat.

Ilanngussaq 2, oqaasertaliussat kiisalu oqaasertaliussanut nassuiaatit

Nr. 6.

Imaatigut assartuineq

Ilulissani, Nuummi Qaqortumilu mittarfinnik taakkunungalu ilaareersunik illunik, teknikkkut sanaartukkanik kiisalu pigisanik nuunneqarsinnaasunik sanaartornermi imaatigut assartuineq Kalaallit Nunaannut, Kalaallit Nunaannit Kalaallit Nunaannilu imaatigut usineq assartuineq pillugu Inatsisartut peqqussutaanni ilaatinneqanngilaq.”

Konto pingaarnermut 10.13.11 Aktiaateqarluni ingerlatseqatigiiffinnut toqqaannartumik aningaasartuutit, oqaasertaliussamut nassuiaatit

Oqaasertaliussanut nassuiaammut matuma kingulianiittup tulluarsarlugit ilannguteqquneqarput:

“Nr. 1.

Oqaasertaliussaq aqcutigalugu Naalakkersuisut Kalaallit Airports A/S-imi aningaasaliinissaat periarfissinneqarpoq. Aningaasaatinik qaffaanikkut aningaasaliisoqassaaq. Ilulissani, Nuummi Qaqortumilu mittarfinnik sanaartornermi aningaasat tamarmiusut 3,4 mia. kr.-iussasut naatsorsuutigineqarpoq (2017-imi akit), taakku ilaatigut Kalaallit Airports A/S-imut aningaasaliinikkut ilaatigullu ingerlatseqatigiiffiup piffissami sivisuumi akilersorneqartussanik taarsigassarsineratigut aningaasalersorneqassallutik. Tamanna tunngavigalugu Kalaallit Airports A/S-ip nammineq aningaasaatimigut pisariaqartitassai tamarmiusut 2,41 mia. kr.-iussasut naatsorsuutigineqarpoq. Taakkunanit 294 mio. kr.-it maannangaaq aningaasaliissutigineqareerput. Kalaallit Airports A/S-imut siunissami aningaasaliinissat Namminersorlutik Oqartussani immikkut ittumik nalinginnaasumillu isertitat arlallit atornerisigut pisinnaapput. Aningaasaliinissamut piginnaatitsissutit tamarmiusut nammineq aningaasaatigisassatut pisariaqartitat tamarmiusut qaangerpaat. Taamaalillunilu aningaasaliissutissat ataasiakkaat ilaasa naatsorsuutigisamit ikinnerunerisigut aningaasanik atugassaqalersinnaassaaq.

Namminersorlutik Oqartussat missingersuusiornermut inatsit naapertorlugu nalinginnaasumik immikkullu ittumik isertitanik arlalinnik pissarsiaqartillugu kiisalu sanaartornermik suliniutini sulisut akileraarutaannit tamakkiisunit isertitanit Kalaallit Airports A/S aningaasalersorneqartussatut naatsorsuutigineqarpoq.

Immikkut ittumik iluanaarutinit, pissarsiassanit assigisaannillu isertitat aningaasanut inatsimmi isertitatut aningaasaliissutinit amerlanerusut.

Aktiaateqarluni ingerlatseqatigiiffinnit immikkut ittunik iluanaarutinit aningaasaliinissamut atatillugu ingerlatseqatigiiffinnit iluanaarutinit ingerlatseqatigiiffinnut inatsimmi maleruqqusat atuuttut malillugit tunniunneqartariaqarput. Oqaasertaliussami annertussutsip taaneqartup annertoqataanik iluanaaruteqartoqanngippat aktiaatinit katillugit 100 mio. kr.-inik nalilinnik tunisinissamut Naalakkersuisut piginnaatinneqarput.

Ilanngussaq 2, oqaasertaliussat kiisalu oqaasertaliussanut nassuiaatit

Kommunit Namminersorlutillu Oqartussat missingersuutaat naatsorsuutaallu pillugit Inatsisartut inatsisaanni nr. 26, 28. november 2016-imeersumi Namminersorlutik Oqartussat naatsorsuutaanni sinneqartoorutitik atuineq pillugu maleruaqqusat erseqqinnerusut aalajangersarneqarput. Sinneqartoorutit ukiup aningaasanut inatsiseqarfiusup kingornagut ukiup tulliuuttup qaangiutinnginnerani atorineqanngitsut § 18, imm. 3 naapertorlugu siunissamut ungasinnerusumut aningaasaliinissanut aningaasaateqarfimmut nuunneqassapput. Siunissami ungasinnerusumi isumannaatsuunissaq, sapinngisamik annertunerpaamik iluanaaruteqarnissaq aammalu inuiaqatigiit aningaasaqarnerannut sapinngisamik pitsaanerpaamik sunniuteqartitsinissaq siunertaralugu aningaasaateqarfimmi aningaasat aningaasalersuutitut atorineqassapput. Kalaallit Airports A/S-imut aningaasaliinikkut siunissami ungasinnerusumi aningaasaqarnikkut isiginiagassat tamakku eqquutsinneqassapput. Mittarfeqarfinnik annertusaaneq attaveqarnikkut, inuiaqatigiit aningaasaqarnikkut iluanaarutaannut ataavartumik iluaqutaasussat aammalu aningaasaqarnikkut ineriartornermut iluaqutaasumik angalanermi bilitsinut aningaasartuutitut appariaataasussat naatsorsuutigineqarpoq.

Nunatta Karsiata 2016-imi naatsorsuutai malillugit 2018-imi aningaasaateqarfimmut 211 mio. kr.-it nuunneqarnissaat naatsorsuutigineqarpoq, taamaaqataanillu 2019-imi 80 mio. kr.-it nuunneqarnissaat naatsorsuutigineqarluni.

Soraarnerussutisiassanut aqqissuussinerit atorunnaarsinneqarnerinut atatillugu ataasiaannartumik isertitat eqqarsaatigalugit ataasiaannartumik akileraarutaasussat annertussusissaat maannangaq annertuumik nalornissutigineqarpoq. Soraarnerussutisiassanut aqqissuussinerit atorunnaarsinneqarlutik Danmarkimi soraarnerussutisiassanut aqqissuussinernut nuunneqarnissaat apeqqutaalluni 200 mio. kr. – 400 mio. kr.-inik ataasiartumik akileraartoqarsinnaavoq. Namminersorlutik Oqartussat immikkut ittumik isertitaqartillugit aningaasat taamaattut Kalaallit Airports A/S-imut aningaasaliissutit atornissaannut Naalakkersuisut oqaasertaliussakkut piginnaatinneqarput.

Sanaartornermi suliniutinit atuinikinnerussutinit utertinneqarumaartussat isigineqartunit ukiumoortumik 50 mio. kr.-inik Kalaallit Airports A/S-imut aningaasaliissuteqarnissamut Naalakkersuisut piginnaatinneqarput. Taama piginnaatitsinermi tunngavigineqartoq tassaavoq mittarfinnik aningaasalersuinissamut tunngavissanut iluaqutaasinnaasunik sanaartornermut kontoni ukiuni tamangajanni atuinikinnerusoqartarnera.

Naalakkersuisut piginnaatinneqarput Kalaallit Airports A/S-imi aktianik aningaasaliinissamut Namminersorlutik Oqartussat Nuummi, Ilulissani mittarfiliutaasa taakkulu illutaasa, teknikikkut atortorissaarutaasa pigisaasalu nuunneqarsinnaasut nalingi allaavigalugit akiliinissamut piginnaatinneqarput. Naalakkersuisut Kalaallit Airports A/S Ilulissani Nuummilu mittarfinnik akiliutinik Namminersorlutik Oqartussat v/Mittarfeqarfiit Nuummi Ilulissanilu nunat tamalaat akornanni mittarfiit atulernissaasa tungaanut attartortitsinissamik pisussaaffilersinnaavaat. Piffissap

Ilanngussaq 2, oqaasertaliussat kiisalu oqaasertaliussanut nassuiaatit

attartortitsiviup nalaani Mittarfeqarfiit mittarfinni pineqartuni isertitanik aningaasartuutinillu isumaginnissapput.

Pigisanik nalilinnik aningaasaliissuteqarneq tigusinissap illikartinneranik piumasaqaateqarnermik ilaneqarsinnaavoq. Tamanna soorlu sillimmasiisussaannermut, Kalaallit Airports A/S-ip Namminersorlutillu Oqartussat aningaasaqarnikkut attaveqaataasa akileraartarnikkut passunneqarnerannik apeqqutinut tunngatillugu naapertuuffeqarsinnaavoq.

Mittarfinnut amigartoorutilinnut tapiiffigeqatigiittarnerup aningaasalersorneqarnissaa siunertaralugu nunanit tamalaanit Nuummut Ilulissanullu ingerlaarfiit siunissami immikkut akitsuusersorneqarnissaat siunertarineqarpoq.

Assersuutigalugu mittarfinnik Kalaallit Airports A/S-imut tunniussinermut atatillugu imaluunniit sioqqullugu, mittarfinnik qulimiguullillu mittarfiinik amigartoorfiusumik ingerlatsiffiusunik, Mittarfeqarfiit tapiiffigeqatigalugit aningaasalersorneqartunik, aningaasaliinissamut siunnersuummik suliaqartoqassaaq. Mittarfeqarfiit akigititaasa aaqqissugaaneramik nutarterinissamut siunnersuusiormut atatillugu suliarineqassasoq naatsorsuutigineqarpoq, siunnersuullu mittarfeqarfissat atuutsikkiartorneqarnerinut naapertuutissaaq mittarfiit ilusissaasa eqqukkiartuaarneranut.

Mittarfinnut aningaasaliissutit immikkut ittumik akileraarutitigut isertitaqarfiussasut naatsorsuutigineqarpoq. Sanaartornerup ilarujussua avataaneersunit suliarineqarnissaa naatsorsuutigineqarsinnaavoq, taakku pisortanit annikitsuinnarmik sullinneqassapput annikitsuinnarmillu isertitanik nuussisoqartassalluni. Sanaartornermi ingerlatanit akileraarutit isertitat taamaattut ukiuni 2018-imit 2023-mut Kalaallit Airports A/S-imut aningaasaliissutiginissaannut Naalakkersuisut piginnaatinneqarput. Aningaasarsianit akileraarutit pillugit Inatsisartut inatsisaanni § 68, imm. 2, nr. 7 kiisalu § 72, a, imm. 1 Ilulissani, Nuummi Qaqortumilu mittarfiliormut atorneqarsinnaanissaat pillugu siunnersuummik 2017-imi ukiakkut ataatsimiinnermi Naalakkersuisut saqqummiussilersaarput. Taakku atorneqarnerisigut sulisut sanaartornermik suliniutini sulisorineqartut akileraarutitigut tamakkiisumik akiliinissamik aaqqissuussinermik malinnittussaataalissapput (tamatumani naatsorsuutigalugu sulisorineqartup ukiut kingulliit arfinillit ingerlanerini nunatsinni akileraartussaataasimannginnissaa). Taamaalillunilu tamakkiisumik akileraaruteqarnissaaq pillugu maleruaqqusat aatsitassanik atorluaanermi aammalu illoqarfiit nunaqarfiillu avataanni sanaartornermik ingerlataqartunut atorneqartut assingi atuutilissapput.

Oqaasertaliussat AI 2017-imit ingerlateqqitaapput.

Ilanngussaq 2, oqaasertaliussat kiisalu oqaasertaliussanut nassuiaatit

Nr. 2.

Kalaallit Airports A/S Namminersorlutik Oqartussanit pigineqarluni Namminersorlutik Oqartussanit ilaannakortumik aningaasalersorneqassaaq. Naqissusiinermut akitsuummik akileeqqusinikkut ingerlatseqatigiiffiup aningaasaataasa tigorianaat tatineqaqqinnissaat naapertuutissanngilaq. 1,6 mia. kr.-inik taarsigassarsinerinnarmi naqissusiinermut aningaasartuutit 24 mio. kr.-iussapput.

Naqissusiinermut akitsuutinik akiliuteqartitsinnginneq Nuummi atlantikoq ikaarlugu umiarsuarnut talittarfiliornermi Sikuki Nuuk Harbour A/S-imut aamma atuutsinneqarpoq.

Kalaallit Airports A/S-ip aningaasalersorneqarnissaa aammalu Nuummi, Ilulissani Qaqortumilu mittarfinnik sanaartornissamik 2018-imi suliariumannittussarsiornissaa eqqarsaatigalugit allannguutit ulloq 1. januar 2018-imit atuutsinneqalertariaqartut naliliisoqarpoq. Tamatuma peqatigisaanik oqaatigineqarsinnaavoq oqaasertaliussap inatsisitigut atuutsinneqalernissaa pillugu UPA2018-imi Inatsisartut inatsisissaattut siunnersuummik saqqummiussisoqassammat.

Oqaasertaliussaq nutaajuvoq.

Nr. 3.

Mittarfiliortiternerit ersarinngittoqarnera imaluunniit pilersaarusionermi tunngavigineqartut pillugit isumaqatigiinnginnerit pissutigalugit kinguarsarneqannginnissaat qulakkeerniarlugu nuna tamakkerlugu pilersaarusionerq pillugu oqaasertaliussaq ilanngunneqarpoq. Pilersaarusionerq aamma nunaminertat atorneqartarnerat pillugu Inatsisartut inatsisaanni § 9, imm. 1-2 naapertorlugit nuna tamakkerlugu pilersaarusionissamut peqqussut kommunimi pilersaarusionermut inatsisitigut kinguneqarsinnaanissaa imaassinnaavoq Naalakkersuisut aalajangereersinnaagaat. Nuummi, Ilulissani Qaqortumilu mittarfinnik illutaannillu aalaakkaasunik, teknikikkut atortunik atortunillu nuunneqarsinnaasunik sanaartornermi pilersaarutitigut tunngavigineqartup qulakkeerneqarnissaanut Naalakkersuisut piginnaatitaanerat qularutigileqqunagu oqaasertaliussaq ilanngunneqarpoq.

Nuummi Ilulissanilu nunat tamat akornanni mittarfinnik sanaartorneq inatsisit atuuttut naapertorlugit ingerlanneqassaaq, tassunga ilanngullugu Atortut ilaasa avatangiisinut sunniutaannik nalilersuineq aamma avatangiisinik nakkutilliinermut akiliutit pillugit Namminersorlutik Oqartussat nalunaarutaat nr. 5, 27. marts 2013-meersoq

Nuummi Ilulissanilu mittarfinnik sanaartornermi avatangiisinut sunniutinik naliliinermik (VVM-imik) suliaqartoqassaaq. Kalaallit Airports VVM-imik suliaqartuussaaq. Naalakkersuisut pilersitsinissamut atatillugu akuersissummik tunniussinerminni sanaartukkat avatangiisinut sunniutigisinnaasai pillugit pisariaqartunik paasissutissinneqarnissaat VVM-imik nassuiaasionermi qulakkeerneqassaaq. Taamattaq VVM-imik nalunaarusionermi, Naalakkersuisut atugassarititaasunik aalajangersaanerminni paasissutissanik pisariaqartunik sanaartukkat avatangiisinut pitsaangitsumik sunniutaasa minnerpaaffimmiitinneqarnissaannut

Ilanngussaq 2, oqaasertaliussat kiisalu oqaasertaliussanut nassuiaatit

qulakkeerisuussapput. VVM-inik suliaqarnerni innuttaasut akuliutsinneqartarnerannut atatillugu aalajangersimasunik periuseqartoqartarpoq.

Naalackersuisut VVM-imik nalunaarusiamik tusarniaanermilu akissutinik tiguneqartunik suliarinninneranni, ilaatigut sanaartormik suliasat piareersarneranni atugassarititaasut isummerfigineqassapput. Nuummi Ilulissanilu mittarfiit sanaartormerup ingerlanneqarnerata nalaa tamakkerlugu atuinnassapput, taamaammallu sanaartormerup ilarujussuata piffissat mittarfiit atornerqarfiisa avataannut inissinneqartarnissaa pisariaqassasoq ilimagineqarpoq.

Kalaallit Airports A/S-ip aningaasalersorneqarnissaa aammalu Nuummi, Ilulissani Qaqortumilu mittarfinnik assigisaannillu sanaartugassat suliariumannittussarsiorneqarnissaat eqqarsaatigalugu allannguutit ulloq 1. januar 2018-imit atuutilertariaqartut naliliisoqarpoq. Tamatuma peqatigisaanik oqaatigineqarsinnaavoq oqaasertaliussap inatsisitigut atuutsinneqalernissaa siunertaralugu UPA2018-imi Inatsisartut inatsisissaattut siunnersuummik saqqummiussisoqassammat.

Oqaasertaliussaq nutaajuvoq.

Nr. 4.

Oqaasertaliussat naapertorlugit Naalackersuisut Inatsisartut Aningaasaqarnermut Akileraartarnermullu Ataatsimiititaliaannit akuerineqarlutik 2,0 mia kr-it angullugit Kalaallit Airports A/S-ip avataani taarsigassarsitsisuiunut taarsigassarsiaanun qularnaveeqqusiisinaanermut, imaluunniit nunatta karsianit 2,0 mia kr-inik taarsigassarsillutik taakku Kalaallit Airports A/S-imut taarsigassarsiariteqqinnissaannut piginnaatinneqarput.

Tamanna Kalaallit Airports A/S-ip sanaartormerup nalaani aningaasalersorallarnerani, ungasissumut sammititamik aningaasalersornerani kiisalu namminersorlutik oqartussat aningaasaliissutaasa aningaasalersorneqarallarnera siunertaralugu.

Oqaasertaliussami uani kisitsisit qummut akunnaallisagaapput, taamaalillunilu oqaasertaliussat akit suliniutillu nalinginnaasumik allanngorarnerannut piareersimareerlutik.

Qularnaveeqqusiisoqannginnerani missingersuusiortarnermut malittarisassat 17. juni 2008-meersut naapertorlugit immikkut ilisimasallit arlaannaanulluunniit attuumassuteqanngitsut aningaasaqarnikkut inatsisitigullu uppersaataannik piniartoqaqqaassaaq.

Oqaasertaliussaq nutaajuvoq.

Ilannugsaq 2, oqaasertaliussat kiisalu oqaasertaliussanut nassuiaatit

Nr. 5.

Oqaasertaliussami nr. 5-imi aalajangersagaq suliniutini angisuuni illuliortiternernik sanaartornernillu suliassat pillugit Inatsisartut inatsisaanni nr. 25, 18. december 2012-imeersumi (Suliniutinut angisuunut inatsimmi) § 7, imm. 4-mi periutsimut atuutereersumut naapertuuppoq: Nunatsinni suliffeqarnermi sanaartornermik suliqaartut sapinngisamik amerlanerpaat mittarfinnik nutaanik sanaartornermi sulissussarsiarineqarnissaat anguniarneqarpoq. Mittarfiliornermik suliniummi sanaartornermi suliassat ima annertutigaat nunatsinni sulissussarsiarineqarsinnaasut saniatigut sanaartornermik suliallit amerlanerit pisariaqartinneqassallutik. Sermersuumi sanaartornermi suliassat annertuut pilersaarutigineqareersut aallartinneqareersulluunniit arlaqarmata mittarfiliortiternermi sulisussaaleqeratartoqarsinnaavoq aammali sulisussaaleqinerup sanaartornermik suliament aningaasartuutit tamarmiusut annertuseriartissallugit. Sanaartornermik ingerlatallit annertuallaamik suliassaqaqqunagit aammalu sanaartornermi akiusut tamarmiusut apparsimaarteqqullugit sanaartornermi isumaqatigiissuteqarnissamik neqeroorutit sanaartornermilu isumaqatigiissutit suliakkiutigineqarnissaannik neqeroorutit nunani tamalaani neqeroorutigineqarsinnaanissaat aammalu nunani tamalaani periutsit pitsaasuunissaat naapertorlugu neqeroorutaareersunik pissarsiniarnissat akuerineqarnissaannut Naalakkersuisut oqaasertaliussakkut piginnaatinneqarput. Nunani tamalaani periusissat pitsaasut naapertorlugit suliariumannittussarsiornissami piumasaatit assersuutigalugu suliariumannittussarsiortarnermi FIDIC-ip nunani tamalaani periusiusut atorneqarnissaannut periarfissiissapput. Aammattaaq nunani tamalaani suliariumannittussarsiortarnermi sulisussat nunanit allaneersut atorneqarnissaannut periarfissiisoqassaaq. Taamaaliornikkut neqerooruteqartut Ilulissani, Nuummi Qaqortumilu Kalaallit Airports A/S sinnerlugu mittarfiliornermik suliqaartussat sanasut, ruujorilerisut, innaallagisserisut sanaartortitsisunilu suliffeqartut akunnermusiallit pillugit Sulisitsisut aammalu Sulinermik Inuussutissarsiuteqartut Kattuffiata akornanni isumaqatigiissummi 1. april 2016-imit 31. marts 2019-imut atuuttumi atugassarititaasut malillugit sulinerup minnerpaamik ingerlanneqarnissaa qulakkiissavaat.

Nunat tamat akornanni suliariumannittussarsiussisoqartillugu Sanaartornermi neqerooruteqartitsisarneq pillugu Inatsisartut inatsisaat nr. 11, 2. december 2009-meersoq atortinneqartassanngilaq. Tamatumalu ilaatigut AP 95 naapertorlugu suliariumannittussarsiussisoqartarnissaanik piumasaqaateqannginneq nassataraa.

Kalaallit Airports A/S-ip aningaasalersorneqarnissaa aammalu Nuummi, Ilulissani Qaqortumilu mittarfinnik sanaartornissamik 2018-imi suliariumannittussarsiornissaq eqqarsaatigalugit allannguutit ulloq 1. januar 2018-imit atuutsinneqalertiaqartut naliliisoqarpoq. Tamatuma peqatigisaanik oqaatigineqarsinnaavoq oqaasertaliussap inatsisitigut atuutsinneqalernissaa pillugu UPA2018-imi Inatsisartut inatsisissaattut siunnersuummik saqqummiussisoqassamat.

Oqaasertaliussaq nutaajuvoq.

Ilanngussaq 2, oqaasertaliussat kiisalu oqaasertaliussanut nassuiaatit

Nr. 6.

Usinik imaatigut assartuineq pillugu oqaasertaliussatut nr. 7-itut siunnersuut suliniutinut angisuunut periutsinut atuutereersunut naapertuuppoq. Suliniutini angisuuni illuliortiternernik sanaartornernillu suliassat pillugit Inatsisartut inatsisaanni (Suliniutinut angisuunut inatsimmi § 13 ima oqaasertaqarpoq: ”Kalaallit Nunaannit, Kalaallit Nunaannut aamma Kalaallit Nunaanni nassiuksanik imaatigut assartuineq pillugu inatsit, ingerlatanut Inatsisartut inatsisaat manna naapertorlugu akuersissummi pineqartunut ilaasunut attuumassutilimmik imaatigut assartuussinermut atuutinngilaq.”

Kalaallit Airports A/S-ip aningaasalersorneqarnissaa aammalu Nuummi, Ilulissani Qaqortumilu mittarfinnik sanaartornissamik 2018-imi suliariumannittussarsiornissaq eqqarsaatigalugit allannguutit ulloq 1. januar 2018-imit atuutsinneqalertariaqartut naliliisoqarpoq. Tamatuma peqatigisaanik oqaatigineqarsinnaavoq oqaasertaliussap inatsisitigut atuutsinneqalernissaa pillugu UPA2018-imi Inatsisartut inatsisissaattut siunnersuummik saqqummiussisoqassamat.

Oqaasertaliussaq nutaajuvoq.”

Aningaasaqarnermut Akileraartarnermullu Naalakkersuisoq - Suliassaqarfik 20 – 24

Nr. 173.

Kontumut pingaarnermut, 20.10.32 Uummannaq eqqaani ajunaarnermuarmut tunngatillugu immikkut ittumik iliuuseqarnissat.

Oqaasertaliussaq tulliuutoq konto pingaarnermut ilannguteqquneqarpoq:

”Nr. 4.

Illorsuarni Nuugaatsiamilu innuttaasut illuliornissamut nammineerluni taarsigassarsiaritineqartut akilernissaannut aningaasartuutaanerisut akilernissaannut Naalakkersuisut piginnaatinneqarput.”

Kontumut pingaarnermut, 20.10.32 Uummannap eqqaani ajunaarnermuarnera tunngavigalugu immikkut ittumik iliuuseqarnissat, nassuiaatit

Oqaasertaliussamut nassuiaatip matuma kingulianiittup ilanngunneqarnissaa qinnutigineqarpoq:

”Nr. 4.

Oqaasertaliussat matumani pineqartut aqutigalugit illuliornissamut nammineq taarsigassarsianut Illorsuarni Nuugaatsiamilu innuttaasunut taarsigassarsiaritineqartunut aningaasartuutaanerulersut akilernissaannut Naalakkersuisut piginnaatinneqarput.

Oqaasertaliussap matuma ilanngunneqarneranut Nuugaatsiami Illorsuarnilu innuttaasut qimarnussuunneqartut akornanni innutaasoqarnera, nunaqarfiit marluk takku ilaanni illumik

Ilanngussaq 2, oqaasertaliussat kiisalu oqaasertaliussanut nassuiaatit

qularnaveeqqusiilluni, nammineq illuutitut taarsigassarsianut sulii akiligassaqartoqarneranik Naalakkersuisut ilisimasaqalersimanerat patsisaavoq.

Nuugaatsiami Illorsuarnilu innuttaasut qimarnussuunneqarnerisa kingorna nunaqarfinnut marlunnet taakkununga innuttaasut uternissaat nunaqarfiullu nalinginnaasumik ingerlaqqilernissaa sulii maannamut periarfissaatinneqanngilaq. Tamanna tunuliaqutaralugu nunaqarfinni marlunni taakkunani illuutini qularnaveeqqusiissutit naleqanngitsutut nalilerneqarput. Taamaakkaluartoq innuttaasut inigisaminnut taarsigassarsiaat sulii ernialersorneqarlutillu taarsersorneqartussaapput.

Oqaasertaliussat aqutugalugit illuliornissamut taarsigassarsiaritinneqartut taakku taamaalillutik nammineq illuliornissamut illulioqataanissanullu il.il. Namminersorlutik Oqartussat taarsigassarsiarititai assigalugit suliarineqassapput, takuuk Aningaasaqarnermut Akileraartarnermullu Ataatsimiititaliap IA-suliaq nr. 17-760-imut akuersissuteqarnera.

Oqaasertaliussat taamaallaat Ummannap eqqaani 2017-imi juunimi ulussaarsuaqarneratigut toqqaannartumik eqqugaasunut Illorsuarmi Nuugaatsiami innuttaasunut tunngatillugu atorneqassapput.

Oqaasertaliussat AI 2017-imit ingerlateqqitaapput.”

Nr. 174.

Konto pingaarneq 20.11.50-imut, Ingerlatsinermit sillimmatit

Oqaasertaliussaq tulliuuttoq konto pingaarnermut ilannguteqquneqarpoq:

“Nr. 2.

Naalakkersuisut Aningaasaqarnermut Akileraartarnermullu Ataatsimiititaliap akuersineratigut konto pingaarnermit 500.000 kr-it tikillugit aningaasanik atuisinnaanerannik piginnaatinneqarput. Aningaasat konto pingaarnermut 27.03.01 Inatsisinut tunngaviusussanut isumalioqatigiissitaq aamma allattoqarfik aningaasaliissutit qaffanneqarnerannut atorneqarsinnaapput. Piginnaatitsinermit aningaasat pineqartut inatsisinut tunngaviusussanut isumalioqatigiissitaq ilaasortaasa akissarsiaqartinnerannut, allattoqarfiup patajaallisarneqarneranut kiisalu Isumalioqatigiissitaq Siulittaasuata Nuummi atuunnerminut atatillugu ineqartinneqarneranut atorneqarsinnaapput. Aningaasanik atugassanngortitsineq Inatsisinut tunngaviusussanut isumalioqatigiissitamut suliakkiissummut tapiliussami nassuiarneqassapput.”

Konto pingaarneq 20.11.50 Ingerlatsinermit sillimmatinut nassuiaatit

Oqaasertaliussamut nassuiaatip matuma kingulianiittup ilanngunneqarnissaa qinnutigineqarpoq:

Ilanngussaq 2, oqaasertaliussat kiisalu oqaasertaliussanut nassuiaatit

“Nr. 2.

Naalakkersuisut Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaata nr. 33, 28. november 2016-imeersup atuutilersinneqarnissaata 2018-imi kingusinnerusukkut pisussanngorlugu kinguartitsisinnaaneramik piginnaatinneqarput. Atuutilersitsinermik kinguartitsineq taamatullu atuutilersitsineq nanoq.gl-ikkut nalunaarutigineqassaaq.

Oqaasertaliussaq nutaajuvoq.”

Nr. 175.

Kontumut pingaarnermut 24.01.01 Akileraartarnermut Aqutsisoqarfik, allaffissornek

Oqaasertaliussaq tulliuuttoq konto pingaarnermut ilannguteqquneqarpoq:

“Nr. 2.

Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaat nr. 33, 28. november 2016-imeersup 2018-imi piffissami kingusinnerusumi atuutilernissaata kinguartinnissaanut Naalakkersuisut piginnaatinneqarput. Atuutilernissaata kinguartinnissaa aammalu atuutilersitsinissaq pillugu nalunaaruteqarneq nanoq.gl-imi nalunaarutigineqarneratigut pissaaq.”

Kontumut pingaarnermut 24.01.01 Akileraartarnermut Aqutsisoqarfik, allaffissornek nassuiaatit

Oqaasertaliussamut nassuiaatip matuma kingulianiittup ilanngunneqarnissaa qinnutigineqarpoq:

“Nr. 2.

Oqaasertaliussami Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaata atuutsinneqalernissaata 2018-imi piffissami kingusinnerusumut kinguartinnissaanut Naalakkersuisut piginnaatinneqarput. Inatsisartut inatsisaat 1. januar 2018 atuutsinneqalerpoq taamaalillunilu peqatigisaanik Kalaallit Nunaannut danskit ingerlatseqatigiiffinnut inatsisai arlallit annertuumik nutarterneqarlutik. Kisiannili ingerlatseqatigiiffinnut inatsisinik nutarterineq kinguaattoorpoq aammalu inuussutissarsiortunik nalunaarsuinerit eqaatsumik nuunneqarnissaat qulakkeerniarlugu, tamanna pisariaqartinneqassappat, Qitiusumik Suliffeqarfinnik Nalunaarsuiffimmi nalunaarsuisarneq pillugu Inatsisartut inatsisaata atuutilernissaata atuutsinneqalernissaatalu 2018-imi piffissami kingusinnerusumiittumut kinguartinnissaanut Naalakkersuisut piginnaatinneqarput.

Oqaasertaliussaq nutaajuvoq.”

**Isumaginninnermut, Ilaqutariinnermut, Naligiissitaanermut Inatsisinillu
Atuutsitsinnermut Naalakkersuisoq – Suliassaqarfik 30**

NR. 176.

Konto pingaarnermut 30.10.32 Meeqqanut tapit

Meeqqanut tapit naatsorsornerisa erseqqissaatiginissaannut kontomi pingarnermi matumani oqaasertanut nalunaarsuummi Nr. 1 paaqquneqarpoq:

”Meeqqanut tapit atorunnaarsinnissaannut killiussaq 375.000 kr.-inut aalajangiunneqarpoq. Aningaasat killiliussat meeqqap siulliup saniatigut meeqqamut ataatsimut 25.000 kr.-inik qaffanneqassaaq.

Tamatuma kingorna meeqqanut tapit imatut naatsorsorneqartalissapput:

Meeqqanut tapit annerpaaffissaa – tunngaviusumik isertitat x procenti qaffariaat= meeqqanut tapit angissusissaa.”

Uuminngalu taarserneqassaaq:

”Tamatuma kingorna meeqqanut tapit imatut naatsorsorneqartalissapput:

Meeqqanut tapit annerpaaffissaa – tunngaviusumik isertitat x procenti qaffariaat= meeqqanut tapit angissusissaa.

Meeqqamut ataatsimut meeqqanut tapiissut 8.477 kr.-iulerpoq.”

**Ilinniartitaanermut, Kultureqarnermut, Ilisimatusarnermut Ilageeqarnermullu
Naalakkersuisoq – Suliassaqarfik 40**

Nr. 177.

Konto pingaarnermut 40.94.17 Kalaallit Nunaata Radioa - KNR

Oqaasertanut nalunaarsuut nr. 1 kontomut pingaarnermut matumunnga tassangalu tunngatillugu nassuiaatit paaqquneqarput, KNR-ip illutassaata nutaap sananeqarnissaata naammassillugu pilersaarusiunneqarnera utaqqimaarneqarmat.

Nr. 178.

Konto pingaarnermut 40.95.01 Eqqumiitsuliornermut kulturimullu tapiissutit allat

Oqaasertaliussaq tulliuuttoq konto pingaarnermut ilannguteqquneqarpoq:

”Naalakkersuisut Aningaasaqarnermut Akileraartarnermullu Ataatsimiititaliamik ilisimatitsinermikkut Eqqumiitsuliornermullu Pinngorartitsisut Ingerlatsisunillu (EPI) konto pingarnermi matumani tapiissutinik allaffissornikkut aqutsinissaannik isumaqatigiissusiornissamik piginnaatinneqarput.

Ilanngussaq 2, oqaasertaliussat kiisalu oqaasertaliussanut nassuiaatit

Isumaqatigiissummi namminersorlutik oqartussat nalinginnaasumik kulturimut aningaasaliissutaat, suliaqarnermik legatii, filmiliornermik ingerlatsinernut aningaasaliissutaat, atuakkanik kalaallisuunik saqqummersitsinermut tapiissutaat nipilersuusiornermilu tapiissutaat ilanngunneqarsinnaapput.”

Konto pingaarnermut 40.95.01 Eqqumiitsuliornermut kulturimullu tapiissutit allat

Oqaasertanut nalunaarsuummut nassuiaat una ilannguteqquneqarpoq:

”Oqaasertaliussatigut Eqqumiitsuliornikkut Pinngorartitsisut Ingerlatsisunillu (EPI) tapiissutinik kontomi pingaarnermi aningaasaliissutaasut ilaannik isumaqatigiissusiorsinnaanermik Naalakkersuisut pisinnaatinneqarput.

Isumaqatigiisut ukiumit aningaasanut inatsiseqarfiusumit sivisunerusumik atuutissanngilaq.

Aningaasat aningaasaliinermi tunngavissarititaasut naapertorlugit atorpeqarnissaat ingerlatsinermi maleruagassat nalinginnaasut naapertorlugit ingerlanneqarnissaasa qanoq ililluni qulakkeerneqarnissaa isumaqatigiissummi allassimassaaq, tassunga ilanngullugit aningaasanik aqutsinermi attuumassuteqannginnissap eqqummaariffigineqarnissaa.

Taamattaq Naalakkersuisoqarfik akisussaasoq kingusinnerpaamik ukiup tulliani 1. juli ukiup siulianut allakkatigut nassuiaammik naatsorsuutinilu tigusaqareersimassasoq allassimassaaq.

Oqaasertaliussaq nutaajuvoq.”

Nr. 179.

Konto pingaarneq 40.98.02 Nuna tamakkerlugu digitaliseeriinnissamut periusissap atuutsilersinnera

Oqaasertaliussaq tulliuuttoq konto pingaarnermut ilannguteqquneqarpoq:

”Nr. 2.

Naalakkersuisut piginnaatinneqarput konto pingaarnermi uani atuinerunissat atuinikinnerunissalluunniit ukiumut aningaasanut inatsiseqarfiusumut tullermut nuutseqqullugit.”

Konto pingaarneq 40.98.02 Nuna tamakkerlugu digitaliseeriinnissamut periusissap atuutsilersinneranut oqaasertaliussat nassuiaataat

Oqaasertaliussamut nassuiaatip matuma kingulianiittup ilanngunneqarnissaa qinnutigineqarpoq:

”Nr. 2.

Aningaasaliissutit ajunnginnerusumik atorpeqarnissaat qulakkeerniarlugu ukiut aningaasanut inatsiseqarfiusut akornanni aningaasanik nuussinissamut Naalakkersuisut tunngavissaqarnissaat

Ilanngussaq 2, oqaasertaliussat kiisalu oqaasertaliussanut nassuiaatit

oqaasertaliussatigut qulakkeerneqarpoq. Nuussisinnaaneq annertoq pisariaqarpoq, aningaasaliissutini IT tungaatigut suliniutit annertuut soorlu Ilanngaasivik aamma tunngaviusumik paasisutissanut programmi ingerlanneqarnerat pissutigalugu, tassani aningaasaliissutinik atuineq ukiuni arlalinni ingerlasinnaammat.

Oqaasertaliussat AI 2017-imit ingerlateqqitaapput.”

Aalisarnermut Piniarnermullu Naalakkersuisoq - Suliassaqarfik 50 – 51

Nr. 180.

Kotomut pingaarnermut 50.01.01 Aalisarnermut Piniarnermullu Naalakkersuisoqarfik

Oqaasertaliussaq tulliuuttoq kotomut pingaarnermut ilanngunniarneqarpoq:

”Kotomut pingaarnermut matumunnga ukiumut aningaasaqarfiusumut tulliuuttumut atuinerminerminerusumik nuussinissaannik Naalakkersuisut piginnaatinneqarput.”

Kotomut pingaarnermut 50.01.01 Aalisarnermut Piniarnermullu Naalakkersuisoqarfik oqaasertaliussat

Oqaasertanut nalunaarsuummut nassuiaat una ilannguteqquneqarpoq:

”Oqaasertanut nalunaarsuutikkut qulakkeerneqassaaq, Naalakkersuisut inatsisitigut tunngavissinneqarmata ukiumut aningaasaliiffiusumut tulliuuttumut aningaasanik nuussinissamut qimmit akiuussutissanik kapoorneqartarnissanut najoqqutassamut 2017-imi aallartinneqartumut aningaasaliissutit pissusissamisoorumik atorneqarnissaasa qulakkeerneqarnissaat siunertaralugu, kisiannili aningaasat atorneqarnissaat kinguaattoorutigineqarsimavoq. Qimmit akiuussutissaannik kapoorinissat killilimmik atorsinnaassuseqarput taamaattumillu piffissap siviisuup ingerlanerani kapuutissat isumannaatsumik toqqortarinineqarnissaat toqqorsiveqarnikkut ajornakusoorluni.

Oqaasertanut nalunaarsuut nutaajuvoq.”

Inuussutissarsiutinut, Suliffeqarnermut, Niuernermut Nukissiornermullu Naalakkersuisoq – Suliniuteqarfik 62-64

Nr. 181.

Konto pingaarnermut 64.12.02 Nukissiorfiit

Tulliuuttut konto pingaarnermi immikkoortutut nutaatut kingullertut oqaasertaliussaq nr. 2-tut ilanngunneqarnissaat qinnutigineqarpoq:

"Kikkut aalisakkanik suliffissuarni akigititanut ilaatinneqarnissaat pillugu Naalakkersuisut erseqqinnerusumik aalajangiisinnaapput."

Ilanngussaq 2, oqaasertaliussat kiisalu oqaasertaliussanut nassuiaatit

Konto pingaarnermut 64.12.02 Nukissiorfiit

Oqaasertaliussat tulliuuttut oqaasertaliussani immikkoortup kingulliup tulliani ilanngunneqarnissaat qinnutigineqarpoq:

”Kalaallit suliffeqarfii kalaalit pisaannik uumasuutaannillu tunisanik tigooraasarnermik pingaarnertut suliaqartut, aalisakkanik suliffissuarni akigititanut ilaatinneqarsinnaanerannik aalajangiisoqarsinnaanera killiussamik aalajangersakkami siunertaavoq.”

Nr. 182.

Konto pingaarnermut 64.12.08 Ataavartumik nukissiuuteqarnermi nukissiuutillu sakkortusaavigineqarneranni ineriartortitsinermut suliniutit

Oqaasertanut nalunaarsuut una kontomut pingaarnermut ilanngunniarneqarpoq:

”Nukissiuuteqarnermut imermullu tunngasuni pilersaarusiornermi 2030-imi pisortat nukissiuutininik pilersuinerup sapinngisamik annertunerpaamik nukissiuutinit ataavartunit pinissaannik Naalakkersuisut siunertaasa tapersersornissaannut nukissiuutit ataavartut misissueqqaarfigineqarnissaat kiisalu siunissami mingutsitsinngitsunut aningaasaalernissanut aalajangiinissarnissanut tunngavissioornissaq pillugu Nukissiorfiit isumaqatigiissutaannut aningaasanik illuartitsisoqassaaq. Aningaasaliissutit tamarmiusut isumaqatigiissutit qaangissanngilaat aamma ukiut missingersuusiortifiusut innarlissanagit.”

Kantomut pingaarnermut nassuiaatit 64.12.08 Ataavartumik nukissiuuteqarnermi nukissiuutillu sakkortusaavigineqarneranni ineriartortitsinermut suliniutit

Oqaasertaliussanut nalunaarsuut pillugu nassuiaat una ilanngunniarneqarpoq:

”Oqaasertanut nalunaarsuut siunissamut ungasissumut pilersaarusiorsinaanissamut periarfissiivoq. Ukiunut amerlasuunut isumaqatigiissusiortarnissaq pisariaqarpoq. Angusassat naammaginartumik angusaqarfiusinnaanissaat pillugu ilisimatusarnikkut ineriartortitsinikkullu suliniutit amerlasuut ukiumit ataatsimit sivilunerusumik suliarineqartariaqartarmata, ukiunut arlalinnut atuuttunik isumaqatigiissuteqartarnissaq pisariaqarpoq. Aammattaaq suliniutit nakkutiginnissannut malitseqartittarnissaannullu aningaasat atorneqarsinnaapput.

Ukiumi tulliuuttumi kingusinnerpaamik maajip aallaqqaataani kontop atorneqarnera pillugu Inatsisartut Aningaasaqarnermut Ataatsimiititaliaat ilisimatinneqartassaaq.

Oqaasertanut nalunaarsuut AIS 2017-imit iluarsivigiereerlugu ingerlateqqineqarpoq.”

Sanaartorneq - Suliniuteqarfik 80 – 89

Nr. 183.

Konto pingaarnemut 89.71.40 Nukissiorfiit, asanaartukkanut taarsigassarsititsineq

Kontomut pingaarnemut matumunnga aningaasaliissutinut allannguutit aappasaaneerlugit pingajussaaneerlugillu oqaluuserineqarnerat tunngavigalugu, oqaasertanut nalunaarsuummi titarnertaaq ataani pineqarpoq peeqquneqarpoq:

”Naalakkersuisut piginnaatinneqarpoq 2018-imi Nukissiorfiit 140 mio. kr.-inik taarsigassarsitissallugit, Nukissiorfiit ingerlanneqarneranit illuartitat peqatigalugit innaallaagissap sarfaanik, imermik kiassarnermillu pilersuutit iluarsaanissaannut nutaallu pilersinnissaannut atorneqartussat.

Uuminngalu taarseqquneqarluni:

”Naalakkersuisut piginnaatinneqarput ukiumi aningaasanut inatsiseqarfiusumi kontomut pingaarnemut matumunnga aningaasaliissutissanut aamma 2018-imi Nukissiorfinnut Nukimmut, imermut kiassarnermillu siunertamut kontop 89.71-ip ataani, Nukissiorfiup ingerlanneqarneranit illuartitat innaallagissap sarfaanik, imermik kiassarnermillu pilersuutit nutarterneqarnerannut nutaanillu pilersitsinermut – kiisalu sanaartorfigissaanermut atugassanut peqatigitillugit Sanaartukkanut Iluarsaassinernullu Aningaasaateqarfimmi illuartitassanut taarsigassarsititsinissamut.”

Nassuiaatit kontomut pingaarnemut 89.71.40 Nukissiorfiit, sanaartukkanut taarsigassarsiarititat

Oqaasertanut nalunaarsuummut nassuiaatini titarnertaaq kingulleq peeqquneqarpoq uuminngalu taarseqquneqarluni:

”Oqaasertanut nalunaarsuut iluarsiivigalugu AIS 2017-imit ingerlateqqinneqarpoq.”